

ORIENTERING OM ARBEIDET MED MØTEPLASS I VALESTRAND SENTRUM

Gjennom inkluderande dugnad av bygdafolk i alle aldrar, vil me skapa ein møteplass som store og små både vil bruka og kjenna ansvar for.

På Valestrand bur det mykje folk, og det har lenge vore eit ønske om å få laga til ein plass i sentrum der det går an å setja seg ned og slå av ein prat. På årsmøtet i Valestrand grendaråd våren 2019 kom dette spørsmålet opp, og det vart sett saman ei gruppe frivillige som tok på seg arbeidet med å etablera ein triveleg møteplass.

Gruppa er samansett av både nytilflytta og «urinvånarar», og me håper på den måten å kunna planlegga litt vidt, og å sjå i ulike retningar.

Området det er snakk om, er det som i områdeplanen for Valestrand har fått namnet «Torget». Plassen ligg mellom parkeringsplassen i sentrum og brua over Valestrandsfossen. Her har det for fleire år sidan stått nokre bord og benker, men desse vart etter kvart oppetne av tidens tann, og plassen har i fleire år stått heilt tom.

Arbeidsgruppa har vore i dialog med kommunen gjennom våren og sommaren 2019, der det m a er blitt søkt om løyve til å bruka plassen som ei mellombels ordning, fram til den endelege oppgraderinga av Valestrand sentrum kjem skikkeleg i gang.

Plassen vart i vår rydda for ugras, rusk og rask som hadde samla seg der, og gruppa er no klare til å gå i gang med sjølve arbeidet.

Tanken vår er å få folk i alle aldersgrupper med på dugnaden. Me trur at dette vil skapa eit skikkeleg eigarforhold til plassen, og trur og at møteplassen på denne måten vil bli flittig brukt.

Ikkje minst er det eit viktig miljøomsyn å få unge og eldre til å arbeida fram mot eit felles mål.

Me tenkjer å bruka hausten og vinteren 2019-20 til mykje dugnadsarbeid rundt i bygda, og ser for oss ein koseleg opningsfest til våren ein gong.

Til no har me gått ut og spurd folk og bedrifter direkte om heilt konkrete oppgåver, og har kun fått positive svar og tilbakemeldingar.

Grindbygg:

Me ønskjer at det skal stå eit enkelt grindbygg i eine hjørnet av plassen, slik at det går an å ha nokre benker og bord ståande under tak. Grindbygg-teknikken er frå gammalt av mykje brukt på Osterøy, og me forankrar på denne måten plassen både i fortid, notid og framtid

Materialar til grindbygg er kjøpt inn, og ei gruppe elevar i ei arbeidsfag-gruppe ved Danielsen ungdomsskule skal arbeida med grindbygget gjennom vinteren. Rune Revheim, som er Osterøy sin fremste ekspert på grindbygg, skal ha eit overordna ansvar for arbeidet.

Me viser til eigen søknad om dette bygget. Ei lokal bedrift hjelper oss med søknaden.

Benker:

Me har fått tak i ein del brukte benker, som skal gjerast klare i løpet av vinteren. Eit par spreke pensjonistar har tatt på seg å administrera arbeidet med å klargjera benkene.

Dei skal få stå inne på Eldsteskulen og holda på med dette, og kjem til å ha trivelege stunder i lag der gjennom vinteren.

Me vil og organisera ei kronerulling i bygda, og etter kvart få kjøpt inn nokre fleire benker og bord.

Plantekasser

For å skapa rom på plassen, og i tillegg skjerma den litt mot trafikken i området, treng me nokre plantekasser. Osterøy Ungdomsskule har tatt på seg arbeidet med desse kassene. Sløyd lærar ved skulen legg det opp som eit elevprosjekt, der elevane sjølv både reknar ut kva dei treng av material, bestiller denne og deretter bygger kassene. Nokre av kassene skal få nettingvegg midt i, slik at me kan skapa rom på plassen av blomstrande, grønne vegger. Material til kassene vil bli skaffa til veie av to lokale bedrifter. Om ikkje elevane klarer å bygga alle kassene me treng, får me fri til pensjonistane som heilt sikkert er lystne på meir dugnadsarbeid etter å ha fått benkene så fine.

Insekthotell / fuglekasser

Me har spurt dei to barnehagane i bygda, og barneskulen, om dei kan få laga nokre insekthotell og fuglekasser til den fine plassen. Etter kvart som det kjem planter og blomar i kassene, vil det summa av liv rundt dei, og dette vil bli ein plass der unge og eldre kan opphalda seg, og studera naturen på nært hald.

Planter

Me vil på same måte spørja barnehagar og barneskule om dei kan så frø til planter me vil ha i plantekassene. Dette blir til våren igjen, og elevane kan sjølv få planta og stella med blomane dei har sådd.

Frø til dette vil dei få hjå oss.

Det vil og bli organisert ei kronerulling eller «planterulling» i bygda, der folk kan få bidra med litt planter som ikkje så lett kan såast. Me ser for oss nokre bærbusker, og ein del klatreplantar bl a.

Det kjem til å bli veldig fint!

Andre idear til ting me kan engasjera bygdefolket med, vil heilt sikkert dukka opp etter kvart som arbeidet med plassen går framover.

Me er uansett sikre på at denne måten å organisera dugnaden på, vil skapa tilhøyrighet og eigarskap. Dette kjem til å bli ein skikkeleg koseleg møteplass som folk i bygda blir glade i, og vil ta vare på.

Valestrand, 16/9 2019

Arbeidgruppa for møteplass i Valestrand sentrum

Alena Julia, Ole Elvik, Eivind Helland Marienborg og Tone Vatle